

Na osnovu člana 16. stav 2. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10), a u vezi sa tačkom IV. Zaključka Vlade, broj: 02-06-807/19 od 16.01.2019. godine, na prijedlog Tima Vlade Zeničko-dobojskog kantona za borbu protiv korupcije, Vlada Zeničko-dobojskog kantona, na 30. sjednici, održanoj dana 22.11.2019. godine, d o n o s i

ODLUKU

Član 1.

(Predmet Odluke)

Ovom odlukom prihvata se Inicijativa Tima Vlade Zeničko-dobojskog kantona za borbu protiv korupcije (u daljem tekstu: Tim Vlade), za reviziju diploma nosioca izvršne vlasti, savjetnika nosioca izvršne vlasti, uposlenih u kantonalnim ministarstvima i drugim tijelima kantonalne uprave (u daljem tekstu: državna služba), uposlenih u javnim ustanovama, zavodima, direkcijama i drugim organima čiji je osnivač Kanton ili se finansiraju iz Budžeta Kantona, javnim preduzećima i privrednim društvima Zeničko-dobojskog kantona sa većinskim vlasničkim kapitalom (u daljem tekstu: Institucije ZDK), a u skladu sa Inicijativom Agencije za prevenciju korupcije i koordinaciju borbe protiv korupcije da svi nivoi vlasti izvrše reviziju diploma.

Član 2.

(Osobe čije diplome su predmet revizije)

Revizijom iz člana 1. ove odluke bit će obuhvaćeni:

- a) nosioci izvršne vlasti i savjetnici nosioca izvršne vlasti,
- b) državni službenici i namještenici u svim ministarstvima i drugim tijelima uprave Zeničko-dobojskog kantona,
- c) uposlenici Institucija ZDK u smislu člana 1. ove odluke.

Član 3.

(Način provođenja revizije diploma u institucijama ZDK)

(1) Institucije ZDK će samostalno provesti postupak detaljne revizije diploma svih uposlenih u skladu sa Uputstvom Tima Vlade i Inicijativom za revizijom diploma kojom su utvrđene mjere i aktivnosti, njihovi nosioci, te materijalno-tehničke pretpostavke za efikasno provođenje.

(2) Provođenje revizije podrazumjeva provjeru vjerodostojnosti podataka sadržanih u svedodžbama/diplomama i to:

- utvrđivanje vjerodostojnosti diploma stečenih na visokoškolskim obrazovnim ustanovama,
- utvrđivanje vjerodostojnosti diploma/svjedodžbi stečenih u srednjoškolskim obrazovnim ustanovama i
- utvrđivanje vjerodostojnosti svjedodžbi stečenih u ustanovama osnovnog obrazovanja

(3) Odluka, Inicijativa o reviziji diploma (provjeri vjerodostojnosti diploma) i Uputstvo za reviziju diploma u institucijama Zeničko-dobojskog kantona (provjera vjerodostojnosti diploma) će biti objavljeni na web strani Zeničko-dobojskog kantona (www.zdk.ba – dio „Aktivnosti Tima Vlade za borbu protiv korupcije“).

Član 4.
(Saradnja sa Timom Vlade)

Obavezuju se rukovodioci kantonalnih institucija iz člana 1. ove odluke da blagovremeno pristupe reviziji, dostavljanju traženih podataka i odgovorno postupaju po Uputstvu Tima Vlade, pružajući punu podršku Timu Vlade i antikorupcijskim koordinatorima u provođenju učinkovite revizije vjerodostojnosti diploma/svjedožbi.

Član 5.
(Rok i izvještavanje institucija)

Zadužuju se institucije da postupak revizije iz člana 1. ove odluke realizuju u roku od 12 mjeseci od dana donošenja ove odluke, te da po okončanju postupka revizije iz člana 1. ove odluke podnesu izvještaj Timu Vlade za borbu protiv korupcije, u kome će se prikazati rad, problemi u radu i postignuti rezultati, naročito u pogledu sprovođenja utvrđene antikorupcijske politike, sa prijedlogom zaključaka.

Član 6.
(Rok i izvještavanje Tima Vlade)

Zadužuje se Tim Vlade za borbu protiv korupcije, da nakon dostavljenih izvještaja iz člana 5. ove odluke, konačan izvještaj o provedenom postupku revizije, dostavi Vladi Zeničko-dobojskog kantona u roku od tri mjeseca.

Član 7.
(Upućivanje Inicijative)

Vlada Zeničko-dobojskog kantona upućuje inicijativu za provođenje revizije diploma Gradu Zenica, Gradu Visoko i svim općinama u Zeničko-dobojskom kantonu.

Član 8.
(Stupanje na snagu i objava)

Ova odluka stupa na snagu danom donošenja i objavit će se u „Službenim novinama Zeničko-dobojskog kantona“.

PREMIJER

Mirza Ganić

Broj: 02-05-17279/19
Datum, 22.11.2019. godine
Z e n i c a

DOSTAVLJENO:

1x Tim Vlade Zeničko-dobojskog kantona za borbu protiv korupcije,
1x Svim ministarstvima i drugim tijelima kantonalne uprave,
1x Svim institucijama ZDK, (putem resornih ministarstava),
1x Svim gradovima i općinama Zeničko-dobojskog kantona,
1x Web stranica Zeničko-dobojskog kantona,
1x „Službene novine Zeničko-dobojskog kantona“,
1x a/a.